

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXVIII No. 18  
Septiyembre 21, 2006  
www.philippinerevolution.net

## Editoryal

# Pat-ud ang pagpukan sang rehimeng Arroyo

**D**alayon nga nagasingkal kag nagadalum ang krisis sang pagginahum sang rehimeng US-Arroyo. Una ini nga nagwasaag sang lumupok sadtong Hunyo 2005 ang mga hublag protesta matapos nabuyagyag ang pagdinaya sa eleksyon 2004 sa "Hello Garci" teyp kag pagkadalang sang pamilyang Arroyo sa jueteng kag nagkalain-lain pa nga anomalya. Naglab-ot sa isa ka bag-o nga halintang ang krisis nga ini sa pagginahum sang ideklarar ni Arroyo ang State of National Emergency sining Pebrero nga sinundan pa sang deklarasyon sang "all-out war" nga nagbunga sang mapintas nga pag-atake sa mga ginadudahan base sang rebolusyon sa kaumahan kag sa demokratikong kahublangang masa kag mga kaaway ni Arroyo sa pulitika.

Gamit ang nagkalain-lain nga tuso kag mapintas nga mga padihot kag maniobra, nakapadugay si Arroyo sa poder. Pero kadungan sini ang labi nga pagsingkal sang krisis kag pagbaskog sang panawagan nga batuan kag pukanon ang iya garuk, mapaniplang, papet kag brutal nga rehimen. Labi sini nga ginahamulag ang kaugalingon, ginapabukal ang kaakig sang pumuluyo kag ginapalig-on ang determinasyon nila nga magbato.


Gin-abuso ni Arroyo ang iya gahum kag naggamit siya sang mga pamaagi nga diktador sa iya halos madasma nga pagpugong sa kamatuoran, tabunan ang iya mga krimen, depensahan ang kaugalingon kag kugmaton ang iya mga pangontra. Ginatiyug-tiyogan

kag ginatiko niya ang nagaluntad nga reaksyunaryong konstitusyon, mga layi kag proseso kag wala panugantugan nga ginalapakan pati mga desisyon sang Korte Suprema. Paagi sa malaparan nga pagpanuhol, kapot niya nga mayorya sa Kongreso kag paglapak sa mga proseso, nahimo nga lagi-lagi ginpabasura ni Arroyo sa mga suluguon niya nga kongresista ang ikaduha nga

kaso sang *impeachment* sining Hulyo. Padayon man ini nga nagapakatig-a nga dumilian ang mga upisyal sang AFP kag gubyrerno nga magtambong sa mga imbestigasyon sang Senado kag Kongreso.

Kadungan sini, wala sing may nagakanngilin nga ginagamit ni Arroyo ang iya gahum kag pribiliheyo agud suhulan ang mga kongresista, lokal nga upisyal, mga upisyal sang militar, huwes kag pati mga tawong simbahan. Ang indi mabakal ginapaagi sa kugmat kag pagpasaka sang kaso nga "rebelyon" kaangot sang mga aksyong protesta kag tuyo kuno nga kudeta sadtong Pebrero lakip ang 40 nga una ginkasuhan. Samtang, ginpasakan sang libelo kag ginaduso ang pagpahalin sa Kongreso kag lisensya bilang abugado ni Rep. Allan Peter Cayetano bilang balos sa pagbuyagyag niya sang nakatago nga manggad sang mag-asawang Gloria kag Mike Arroyo sa luwas sang pungsod.

Ginakugmat pati ang



**Mga tampok  
sa isyu nga ini...**

**Waay na nahuya  
si Arroyo** PAHINA 4

**Pagpaslaw sa RSOT  
sa Albay** PAHINA 8

**Lima ka tuig matapos  
ang 9-11** PAHINA 10


mga kritikal sa midya, lakip ang 42 nga mamahayag nga ginpasakaan sang kaso nga libelo sang pamilyang Arroyo halin 2004 bangud sa mga ginbuyagyag nga nakatago nga manggad, korapsyon, pagkadalagig sa ismagling kag iban pa nga mahigko nga buluhaton kag krimen sang pamilya.

Ang pinakamabaskog nga nagabato kag indi mapahog sang rehimeng Arroyo ginapahipos paagi sa direktang kalakasan. Halin sang ginsuguran ang Oplan Bantay Laya pagkapungko ni Arroyo sadtong 2001, masobra 750 na nga mga progresibong aktibista, abugado, tawong simbahan, tawong midya kag ordinaryo nga pumuluyo ang ginpatay sang *death squad* nga ginapahulag sang AFP kag ginahatagan direksyon sang Cabinet Oversight Committee on Internal Security (COSIS) sang Malakanyang.

Permi nga kasugpon sang pasistang kalakasan ang pasistang propaganda. Kadungan sang mga pasistang atake ang madamu nga mahigko nga kampanyang saywar, pagpanamad kag anti-komunistang pagpamahog sa mga progresibong organisasyon kag alyansa nga lunsay ginapagguwa nga "prente sang

mga komunista" ukon "kaway sang estado" agud hatagan-rason ang pagatake sa ila sang mga armadong pwersa sang estado. Malaut pa nga ginatuyo nga isaylo sang mga pasistang propagandista ang basol sa rebolusyonaryong hublag ukon sa mga biktima mismo sang mga pagpamatay. Isa ka paltik nga imbestigasyon ang ginhimo subong sang rehimen paagi sa gintukod nga Melo Commission nga ginagamit para iabswelto ang rehimen kag AFP kag pagguwaon nga kahimuan sang Bag-ong Hangaway sang Bantay kag rebolusyonaryong hublag ang mga pagpamatay.

Sa tunga sang dugang nga ginagubot kag ginapuruhan sang patung-patong nga mga akusasyon kag pagpakamalaut sini, ginapasasan subong ni Arroyo ang mas "estrategiko" nga mga tikang agud konsolidahon ang iya kapot sa poder. Ginapadasig na sang rehimen ang mga pagpatuman sang Cha-cha (charter change ukon pagbag-o sang konstitusyon), nga nakadisenyo para masiguro ang pagpabilin




sa poder niya kag tanan nga kahimbon niya sa poder tubtub 2010 ukon lampas pa diri, limitahan ang mga garantiya sa mga tawhanong kinamatarung kag pangpulitika kag mangganyo ang suporta sa iya sang imperyalistang US kabaylo ang labing pagbukas sa ila pagpasilabo kag kontrol sa teritoryo, ekonomya, pulitika kag militar sa pungsod. Lapnagon nga ginalapak-

an sang mga idu-ido ni Arroyo ang tanan nga nagaluntad nga layi agud mahiwat ang "constituent assembly" (pagboto sang Kongreso para sa Cha-cha nga nagabale-wala sa Senado) ukon ang "people's initiative" (pagpalusot sang mga peke nga pagpapirma nga ginasuportahan sang Malakanyang) bilang paagi sang pagbag-o sa konstitusyon.

Bilang paniguro, nagahanda gihapon ang Malakanyang nga lutuon ang eleksyon sa masunod nga tuig—pareho sang ginhimo sadtong 2004—agud masiguro ang mayorya nga kontrol gihapon sang guban Arroyo sa Kongreso, Senado kag mga lokal nga gubyerno. Sobra-sobra nga ginagamit subong ni Arroyo ang iya kontrol sa pondo kag mga rekursong gubyerno, pati na sa mga kapot sini nga bangko, ahensya pangpinansya kag iban pa nga korporasyon agud magamit sa pagpanuhol sa mga pulitiko kag mabakal ang ila lealtad. Kadungan sini ang mga maniobra agud kuhaon sa poder antes ang panahon sang eleksyon ang mga oposisyonistang upisyal pareho sang ginhimo nga pagsuspende kay Mayor Wenceslao Trinidad sang Pasay City kag sa ginaplano subong nga kontra kay Mayor Jejomar Binay sang Makati City.

Arrogante nga ginabalabad ni

*Sundan sa "Editorial..." pahina 3*

 <p>Tuig XXXVIII No. 18 Setyembre 21, 2006</p> <p>Ang <i>Ang Bayan</i> ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa Philippine Revolution Web Central nga makit-an sa:</p> <p><a href="http://www.philippinerevolution.org">www.philippinerevolution.org</a></p> <p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa: <a href="mailto:angbayan@yahoo.com">angbayan@yahoo.com</a></p>	
<p>Ang <i>Ang Bayan</i> ginabantala duha ka beses kada bulan sang Komite Sentral sang Partido Komunista sang Pilipinas</p>	

## Kaundan

### Editorial

Pat-ud ang pagpukan sg rehimeng Arroyo	1
Lakbayan	3
Waay na nahuya	4

### Pagpanghalit sg pasistang estado

Wala untat nga pagpang-abuso	5
Singgit para sa HUSTISYA	6
Sampal sa mga biktima	7

### JPEPA: Bunal sa lokal nga ekonomya

Papaslaw sa RSOT sa Albay	8
---------------------------	---

### Lima ka tuig matapos ang 9-11

Patung-patong nga kaswalti	10
Dugang nga kabutigan	11


Balita	12
--------	----

Gloria Arroyo ang kapot niya nga gahum. Pero sa kada kahigayunan nga abusuhon kag lubuson ni Arroyo ang iya kagamhanan kag mga pribiliheyo, labi lamang niya nga ginahayag ang kagarukan kag pagka antinasyunal, kontra-pumuluyo kag kontrademokratiko sang iya rehimen kag sang bilog nga sistema, ginapainit ang kaakig sang pumuluyo kag ginahimo nga labing maathag kag mahina nga target sang pagbato sang pumuluyong Pilipino ang iya rehimen.

Pareho sadtong panahon sang diktaduryang Marcos, dulot sa sobra-sobra nga paggamit ni Arroyo sa gahum sang estado agud tiplangon, abusuhon, pwersahon kag lupigon ang pumuluyo kag magpakatig-a sa poder, milyun-milyon nga pumuluyo ang nagapukaw sa paghulag kag magbato. Samtang ginadumilian niya ang iya mga upisyal nga magatubang sa mga imbestigasyon, labing nagakabuyagyag ang mga kabutigan kag nagadamo ang nagapa-ngita sang kamatuoran. Samtang mas madamu siya nga ginasuhulan agud baklon ang katampad, labi nga nagaalingasaw ang baho niya kag sang iya rehimen. Samtang mas daku ang manggad nga iya ginakawat kag ginatago, labi siya nga ginakangil-aran sang imol nga pumuluyo. Samtang mas madamu siya nga ginakugmat kag ginapahug, ginapakuot, ginahunong kag ginapapatay, labing nagadamu ang nagakapukaw, nagahandum sang hustisya kag kahilwayan, nagaaisog kag nakakita sa hugot nga kinahanglanon nga batuan kag bayluhan ang ginakangil-aran nga rehimen kag sistema.

Sa pihak sang mas mabaskog nga kontrol sang diktaduryang Marcos sa armadong kusog, napaslawan ini nga lubos nga tapnaon kag patyon ang rebolusyonaryong hublag kag ang paghimakas sang bilog nga pumuluyong Pilipino, tubtub sa da-

## Lakbayan



NAGSUGOD magmartsa halin sa Calamba, Laguna sadtong Septyembre 18 ang caravan sang masobra 1,000 pumuluyo para kundenahon ang sistematiko nga pangpulitika nga pagpamatay sang rehimen Arroyo kag iban pa nga paglapas sa tawhanong kinamatarung. Magatipun-tipon ang mga nagaprotesta sa Septyembre 21 sa isa ka daku nga rali sa Liwasang Bonfacio, Maynila bilang pagdumdum sa layi militar. Sa Central Luzon, naglakat sining Septyembre 19 ang 15 salakyan upod ang 1,000 katapu kag kadampig sang BAYAN-CL halin sa City of San Fernando, Pampanga padulong sa Maynila.

Sa luwas sang pungsod, magahiwat sang mga *vigil-raly* sa mga embahada sang Pilipinas ang mga katapu sang International League of Peoples' Struggle, BAYAN-USA kag mga tagasuporta nila sa mga pangunahon nga syudad sang US, Honolulu, Canada, Hongkong, Korea, Taiwan, Japan, Australia kag Belgium bilang pagdumdum sa International Day of Protest against Political Repression in the Philippines subong nga Septyembre 21.

AB

layon nga napukan ini sadtong Pebrero 1986. Tuman nga mahina ang kontrol ni Arroyo sa armadong kusog nga pihak-pihak kag madamu nga disgustado sa iya pagginahum. Labi nga indi niya mahimo nga pungan ang pagsulong sang rebolusyonaryong hublag kag hikawan ang pagdaug sa pagbato sang pumuluyo. Pinakadaku nga paborableng sangkap sa bahin sang pumuluyong Pilipino ang indi magpalupig sa kubay nila nga demokratikong kahublagang masa nga wala untat kag lubos kaisog nga nagabuyagyag kag nagabato sa pasismo, kagarukan kag pagkapapet sang rehimen Arroyo kag mga determinado kag mabaskog nga armado nga rebolusyonaryong pwersa nga nagabakbak sa armadong haligi sang rehimen Arroyo, nagahatag-inspirasyon sa pagbato sang pumuluyo nga nagabato kag wala untat nga nagapasulong sang paghimakas tubtub sa lubos nga kadalag-an.

Ginahandum sang tanan nga rebolusyonaryong pwersa kag sang malapad nga pumuluyo ang pinakamadasig nga pagpukan sang rehi-

meng US-Arroyo agud sa pinakatemprano nga panahon maagum ang hustisya kag magasulhay na ang banwa. Sa amo man, samtang nakapadugay sa poder ang rehimen US-Arroyo, labi nga madalum nga nakaukit sa paminsaron sang pumuluyo ang mapait nga inagihan sa idalum sang garuk kag brutal nga pagginahum kag labi nga nangin maathag sa mas madamu nga pumuluyo ang pagkakinahanglanon maghulag kag tapuson ang rehimen sa labing madali nga panahon. Samtang nagadugay sa poder, labing nangin tuktukon kag mahina ang alambre nga ginalatayan sang rehimen.

Nagaangkon man sang dugang nga kahigayunan kag panahon ang mga rebolusyonaryo kag progresibong pwersa nga pasanyugon ang pagpukaw, pag-organisa, pagtipon sang kusog kag pagpahulag sang mas malapad nga kubay sang pumuluyo sa husto nga dalan sang paghimakas padulong sa pag-agum sang tunay nga kahilwayan, demokrasya, kalinungan kag kauswagan.

AB

# Waay na nahuya

**W**ala sang kahuy-anan nga bumyahe si Gloria Arroyo sa Finland, Belgium, United Kingdom (UK), Cuba kag Hawaii sining Septyembre 8-17 nga duguon ang mga kamot sa kadamu sang mga biktima sang pagpamatay sang iya rehimen. Baliskad sa iya ginalauman, sa kada kad-tuan niya indi palakpak ang nagasug-alaw sa iya kundi protesta sang mga migranteng Pilipino kag kritisismo sang nagkalain-lain nga lider bahin sa makasiligni nga rekord sang iya rehimen.

Napaslawan si Arroyo nga likawan ang isyu sang lapnagon nga pangpulitika nga pagpamatay kag pagkuot sang mga progresibong aktibista kag iban pa nga kaaway sa pulitika sang iya gubyerno. Nagkadto siya sa Europe para siling niya mag-engganyo sang pamumuhunan sa pungsod, pero mas interesado ang mga lider didto nga magpahayag sang ila pagkabalaka sa lapnagon nga mga paglabag sa tawhanong kinamatarung sa Pilipinas.

Sa iya mensahe sa Asia-Europe Meeting (ASEM) sa Finland sadtong Setyembre 13, ginpahayag ni Foreign Minister Erikki Toumojia sang Finland nga gusto nila matapos na ang lapnagon nga mga kaso sang pangpultika nga pagpamatay sa Pilipinas. Sang bumisita si Arroyo sa Brussels, Belgium, ang mensahe man nga ini ang nagsug-alaw sa iya sang mga lider sang European Union kag sang pinakamataas nga pamunuan sini, ang European Commission nga ginapamunuan ni Pres. Jose Manuel Barroso.

Baliskad sa ginapagguwa sang Malakanyang, indi matuod si Arroyo mismo ang nagbukas sang isyu sang tawhanong kinamatarung. Sa atubang sang malaparan nga pagpakamalaut, napilitan lang siya nga atubangon sadtong Septyembre 14 si Irehe Khan, Secretary General sang Amnesty International, nga nagpahayag sang kawad-on pagsalig sa ginahimo nga imbesti-

gasyon sang Melo Commission. Ginbasa pa ni Khan kay Arroyo ang internasyunal nga ubay sa mga "investigative commission" tulad sang Melo Commission agud mangin tunay nga independyente, maki-biktima kag mapatihan ang mga ini.

Sa desperasyon nga mapahigad ang halambalanon sang mga pagpatay kag paglapas sa tawhanong kinamatarung, napilitan na lang si Arroyo nga imbitahan ang mga pungsod nga katapu sang European Union, UN Human Rights Commission kag iban pa nga organisasyon nga nagatib-ong sang tawhanong kinamatarung nga mag-obserbar sa ginahimo nga imbestigasyon sa pungsod. Pero sa ginapakita nga daku nga sarswela nga imbestigasyon sang Melo Commission, sigurado nga wala sang makumbinsi si Arroyo.

**Mga protesta.** Diin man magkadto si Arroyo, ginasug-alaw siya sang mga protesta. Sa Belgium, naglunsar sang protesta ang mga Pilipino kag mga abyan nga Belgian sa atubang sang bilding sang European Commission agud kundehon si Arroyo. Nag-upod kag

naghambal sa rali ang duha ka myembro sang parlamento sang Belgium. Nanawagan sila sa pumuluyong Belgian nga magbulig sa pagpangapin sang mga tawhanon nga kinamatarung kag demokrasya sa Pilipinas.

Sa UK, nagpiket ang mga Pilipino sa atubang sang bilding nga nahamtangan ni Arroyo. Pagkagab-i, naglunsar sang *prayer vigil* para sa tanan nga mga biktima sang rehimen.

Sa Hawaii, ginsug-alaw siya sang protesta sang mga migrante didto sa pagpanguna sang Anakbayan-Honolulu. Ginpakita nila ang ila pagkangil-ad kay Arroyo sa iya pakitang-tawo lamang nga paghatag kabalaka sa mga migranteng mamumugon samtang sistematiko niya nga ginapamatay ang ila mga kasimanwa.

**NAM.** Halin sa Europe, nagkadto si Arroyo sa Havana, Cuba agud magtambong sa asembleya sang 118 pungsod nga katapu sang Non-Aligned Movement sadtong Septyembre 16. Waay gid nagakabagay si Arroyo sa NAM nga gintukod sang mga pungsod nga nagatib-ong sang kahilwayan batuk sa kontrol sang anuman nga dumuluong nga gahum. Baliskad sa maki-US nga panindugan ni Arroyo, nagpahayag ang NAM sang pagsuporta sa kinamatarung sang Iran sa enerhiyang nukleyar kag pagkunderar sa mga "iligal nga polisiya" sang Israel sa Palestine kag paglusob sini sa Lebanon. Bag-o pa man mabilog sang NAM ang mga resolusyon nga ini, madugay na nga nakahalin si Arroyo.

AB





# Wala untat nga pagpang-abuso sa tawhanong kinamatarung

**W**ala untat gihapon ang mga pagpamatay, pagkuot, tortyur, iligal nga pag-aresto kag detensyon kag iban pa nga makangingidlis nga paglapas sang mga armado nga gaway sang estado sa tawhanong kinamatarung sang pumuluyo. Halos wala sang adlaw nga mag-agi nga wala sang bag-o nga kaso sang pagpang-abuso militar. Masunod ang pinakaulihi nga nalista nga mga kaso:

**Septyembre 16.** Ginpang-luthnang sang 11 lalaki nga naka-bonet kag naka-combat boots si Christopher Lunar, 31, lider mang-unguma kag *municipal coordinator* sang partido Anakpawis sa banwa sang Del Gallego, Camarines Sur. Nagalimpyo siya sang iya kudal sa Barangay Sta. Rita II sa Del Gallego sang palibuton ang iya balay sang mga lalaki nga armado sang mga .45 kal. pistola. Si Lunar ang ika-33 nga myembro sang Anakpawis nga ginpatay sang mga *death squad* sang rehimeng Arroyo.

Sadto man nga adlaw nga ina, ginpatay sang apat nga armadong lalaki si Pablito Glean, *chief security officer* sang oposisyunistang meyor nga si Jejomar Binay sang Makati City. Ginluthang si Glean samtang nagakakape upod sang iya mga abyan sa isa ka tindahan sa Taguig City. Napatay man ang isa ka *security guard* kag napilasan ang tatlo nga abyan ni Glean sa pagpangluthang. Bag-o lang nga ginbuyagyag ni Glean sadtong Agosto sang "Operation Phoenix," isa ka padihot sang Malakanyang para targeton man sang pangpulitika nga pagpamatay ang mga oposisyunistang anti-Arroyo.

**Septyembre 15.** Tatlo ka myembro sang partido Anakpawis ang gindakup sa tagsa-tagsa nila ka balay sa Sityo Sabitan, Barangay

Sto. Rosario, Malolos City. Ginluthang kag gin-interogar sila sang 20 oras bahin sa presensya kuno sang Bag-ong Hangaway sang Banwa (BHB) sa ila barangay. Ang iligal nga pag-aresto kanday Francisco Nicodemus, Emmanuel Maceda kag Sonny Rodante Cabague ang una nga nalista nga paglabag sa tawhanong kinamatarung sa idalum sang pagpamuno ni Maj. Gen. Juanito Gomez, ang nagbulos kay Maj. Gen. Jovito Palparan nga nagretiro bilang hepe sang 7th ID sining Septyembre 11.



Iligal man nga inaresto sa adlaw nga ini sa San Marcelino, Zambales ang tatlo ka minoryang mangunguma nga sanday Nelson Mallari, Nardo Serrano kag Andres Dacanay—lunsay mga lider sang Central Luzon Aeta Association. Gindakup sila sang makaagi sa tsekpoynt kag wala sang mapakita nga sedula. Ginhunong sila sang pulisya sa sa Castillejos, Zambales kag ginbuhian lamang sang magreklamo ang Kilusang Magbubukid ng Pilipinas.

**Setyembre 13.** Malubha nga napilasan si Joseph Domingo sa Sityo Mathay, Barangay Tuyoy, Bala-nga City, Bataan bandang alas-7 sang aga matapos siya akusahan nga katapu sang BHB kag ginlut-

hang ni P02 Leonardo Boy Tan, isa ka elemento sang PNP Special Action Force.

Sadtong adlaw man nga ina, iligal nga gindakup sang mga elemento sang RPA-ABB sa Sityo Bato-Bato, Barangay Tabun-ac, Toboso, Negros Occidental ang napulo ka myembro sang Teatro Obrero, grupo pangkultura sang National Federation of Sugar Workers. Tubtub hapon nga ginkaptan kag ginapasa-pasa sang RPA-ABB, Philippine Army kag pulisya sang Toboso ang napulo ka aktibista pangkultura antes sila buhian. Inakusahan sila nga mga bag-ong rekrut sang BHB. Nagkadto sila sa Toboso para mag-ensayo para sa isa ka *street play* nga ipagguwa nila sa anibersaryo sang Escalante Massacre sa Septyembre 21.

**Septyembre 12.** Ginluthang sang duha ka nakamotorsiklo nga lalaki sa Calamba, Laguna bandang alas-12:30 sang hapon si Nemesia Aquino, presidente sang JAM Liner Employees Union-National Federation of Labor Unions. Nakagguwa gid lamang siya sa *regional office* sang Department of Labor and Employment kon sa diin siya nagtambong sa bista sang kaso sang ila unyon sang siya paulanan sang bala. Namatay ang biktima masobra isa ka oras matapos siya dalhon sa ospital bangud sa duha ka igo sang baril sa iya likod.

Samtang, sa Mauban, Quezon, ginkuot sang mga ginadudahan elemento sang militar si Marco Ferdinand, Bayan Muna *coordinator* sa banwa nga ina. Si Ferdinand gina-akusahan sang militar nga myembro sang BHB.

**Septyembre 11.** Ginsalbeyds



sang mga tropa sang 19th IB ang *hors de combat* nga si Bibiano Rentillosa, sekretaryo sang Northern Leyte Front. Nagapaligo si Rentillosa sang makibon siya sang mga suldado sa Barangay Libertad, Kananga, Leyte. Bangud indi siya armado wala magbato si Rentillosa. Suno sa mga nakasaksi nga tagabaryo, nakita nila nga buhi kag wala pilas nga gindakup si Rentillosa. Pero wala magdugay ginbalita sang militar nga namatay kuno siya sa isa ka engkwentro upod ang tatlo pa ka Pulang hangaway. Ginahimutig sang National Democratic Front sa rehiyon nga natabo ang engkwentro. Wala man siling sini sang namatay nga mga gerilya kag wala man sang nakuha nga armas ukon dokumento kay Rentillosa.

**Septyembre 10.** Ginkuot sang mga elemento sang 74th IB sa Barangay Buenavista, San Narciso, Quezon sanday Midwen Hiwatig, 26, kag Jovito Marco, 23, bandang ala-una sang kaaganhon. Gindala ang duha ka mangunguma sa Camp Nakar sa Lucena City pero sang pangitaon didto ni Flordeliza Hiwatig, iloy ni Midwen ginsiling sang militar nga wla sa ila ang mga ini.

**Septyembre 7.** Nakit-an ang bangkay ni Napoleon Bautista sa Calumpit, Bulacan pito ka adlaw matapos siya kuoton sang mga suldado sa ila balay sa Barangay San Roque, Hagonoy, Bulacan upod sang iya tiayon nga si Ofelia. Pareho nga katapu sang Anakpawis-Hagonoy ang mag-asawa. Ginbuhian sadtong Agosto 31 ang tuman nga ginbakol nga si Ofelia. Si Napoleon naman halos indi na makilala sang makit-an ang iya bangkay bangud guba ang guya. Gintapyas man ang isa niya ka talinga kag madamu siya nga buno sa bilog nga lawas.

Samtang, ginpatay sa Barangay Cantubod, Danao, Bohol sang duha ka lalaki nga nakamotorsiklo si Victor Olayvar, 41, *provincial coordinator* sang Bayan Muna (BM) kag upisyal sang Hugpong sa mga Mag-uumang Bol-anon (HUMABOL). Si Olayvar isa sa apat nga lider sang HUMABOL nga target sang asasinasyon sang 302nd Bde. Ang tatlo pa amo sanday Felipeneri Bejasa, *vice chairman* sang HUMABOL; William "Boy" Banting, *chairman* sang HUMABOL; kag Tomasa Santos, tagapangulo sang HUMABOL sa Alicia, Bohol.

Sa adlaw man nga ina, ginluthang tubtub mapatay sang mga nakamotorsiklo nga lalaki sanday Konsehal Roberto Victoria kag asawa niya nga si Shirley banday alas-5:30 sang aga sa Pulilan, Bulacan. Aktibo nga nagasuporta ang mag-asawa sa paghimakas sang mga mangunguma sa Hacienda Menez sa banwa nga ini. Samtang, sa Barangay San Jose, Hagonoy, Bulacan ginkuot sang mga armadong lalaki sanday Roderick Jonh Cruz kag Marvin Verano kag pwersahan nga ginsakay sa isa ka *owner-type* nga dyip.

**Septyembre 4.** Ginluthang tubtub mapatay sang pito ka armadong lalaki si Ranbert "Alvin" Placencia, *municipal coordinator* sang partido Anakpawis sa Mawab, Compostela Valley, tserman sang Nuevo Iloco Farmers Association kag *council member* sang Nagkahiusang Mag-uuma sa Mawab. Si Placencia, nga ginakawat-an man sang iya bag kag *cellphone*, ginpatay matapos sitahon sang mga kriminal ang ginasakyan niya nga motorsiklo sa Purok 8, Sta. Monico, Nuevo Iloco, Mawab. Siya ang ika-77 nga biktima sang pangpulitika nga pagpamatay sa Southern Mindanao. AB

## Singgit para sa HUSTISYA

**P**ormal nga gintukod sadtong Septyembre 15 sa University of the Philippines ang HUSTISYA! (Victims of the Arroyo Regime United for Justice ukon "Mga Biktima ng Rehimeng Arroyo nga Nagahiliusa Para saKatarungan") bilang pungsodnon nga organisasyon sang mga biktima sang mga ekstrahudisyal nga pagpamatay kag mga biktima sang pangpulitika nga pagpang-ipit kag iban pa nga paglabag sa tawhanong kinamatarung sa idalum sang rehimeng Arroyo.

Nagdesisyon ang mga biktima kag mga pamilya nila nga magtukod sang organisasyon agud ipamilit ang pangangkon sang hustisya kag pagtapos sa terorismo sang estado. Nahibal-an nila nga wala sila sang paabuton nga seguridad ukon simpatiya halin sa rehimeng Arroyo gani akuon na nila ang responsibilidad sa pag-amlig sa mga saksi kag pagdepensa kag pagpreserba sang importante nga ebidensya.



Lakip sa mga nagtambong ang pamilya ni Benjaline Hernandez, manunulat sa Ateneo de Davao University kag *deputy secretary general* sang KARAPATAN sa Southern Mindanao nga sinalbeyds sang mga tropa sang AFP sadtong Abril 2002 sa North Cotabato. Nagserbi nga tagapamaba sang HUSTISYA ang iya iloy nga si Evangeline. Nagtindog nga *convenor* sanday Dr. Chandu Claver, asawa ni Alice Claver kag Orly Marcellana, asawa ni Eden Marcellana, lunsay mga biktima sang pangpulitika nga pagpamatay. Si Alice, isa ka *coordinator* sang Bayan Muna ginpatay sadtong Hulyo sa Kalinga samtang si Eden *secretary-general* sang KARAPATAN-Southern Tagalog nga ginpatay sa Oriental Mindoro sadtong Abril 2003. AB

## Sampal sa mga biktima

**M**abaskog nga sampal sa mga biktima sang paglapas sa tawhanong kinamatarung ang padya ni Gloria Arroyo sa iya paborito nga pasistang heneral—ang promosyon niya bilang myembro sang iya kabinete.

Antes pa magretiro si Maj. Gen. Jovito Palparan sadtong Septyembre 11 ginanunsyo na ang pagtalana sa iya bilang *deputy national security adviser*. Pero napilitan ang Malakanyang nga iatras ini sa kabaskog sang kundenasyon halin sa sulod kag guwa sang pungsod. Ang pareho nga pasista ni Palparan nga si Ret. Lt. Gen. Pedro Cabuay, anay hepe sang Southern Luzon Command, ang gintalana diri. Plano nila nga “palamigon” anay si Palparan sang isa ka bulan antes italna siya sa Presidential Task Force on Counter-Insurgency sa idalum ni Executive Secretary Eduardo Ermita, isa sa mga pangunahon nga militarista sa kabinete ni Arroyo.

Siling sang Partido Komunista sang Pilipinas sa isa ka pahayag, sa padya niya nga ini kay Palparan kag Cabuay ginapalapad na sang Malakanyang sa bilog nga pungsod ang pasista nga kalakasan nga ginasabwag niya sa mga lugar nga ginatalaan niya. Senyas man ini sa AFP nga pasingkion pa ang mga armadong atake batuk sa ligal nga demokratikong kahublagan kag mga di armadong sibilyan sa kaumhan kag kasyudaran. AB

## Japan-Philippines Economic Partnership Agreement Dugang nga bunal sa lokal nga ekonomya

**P**inirmahan sang mga tiglawas sang Pilipinas kag Japan sining Septyembre 8 ang Japan-Philippines Economic Partnership Agreement (JPEA), isa ka kasugtanan nga ginhagna sadtong 2002 kag likum nga ginhimo sa sulod sang apat ka tuig. Katulad sang iban pang kasugtanan para sa “libreng negosyo,” ang JPEA nakabalayon sa doktrina sang imperyalistang globalisasyon kag nagatuyo nga lubos nga iliberalisa ang ekonomya sang mga atrasado kag di-industriyalisadong pungsod. Ini ang una nga kasugtanan bilateral para sa “libreng negosyo” nga ginsulod sang Pilipinas, dugang sa mga kasugtanan multilateral nga pinirmahan sini bilang bahin sang World Trade Organization.

Sa idalum sang JPEA, pagapanubuan sang rehimeng Arroyo sang tubtub 80% ang mga taripa sa mga produktong industriyal, agrikultural kag iban pa sa sulod sang napulo ka tuig. Sa amo man, nangako ang rehimen nga maghatag sang insentibo sa mga higanteng kumpanyang Hapon para magsulod sa lokal nga industriya sang salakyan kag elektroniks. Lakip diri ang pagpanubo sang taripa sa salsalon nga halin sa Japan sang tubtub 60% sa tuig 2010 kag lubos nga pagdula sa mga taripa sa mga salakyang Hapon sa masunod nga tinuig. Kabaylo sini, panubun kuno sang Japan ang mga taripa sini sa mga produktong agrikultural halin sa Pilipinas, pareho sang pinya kag saging. Sa amo man, nangako ang Japan nga magabaton sang 200 Pilipino nga nars kag *caregiver* kada tuig.

Sa una nga lantaw pa lamang, tuman kadaku sang disbalanse sa tunga sang ginsurender sang rehimeng Arroyo kumparar sa di signipikanteng mga kunsasyon nga ginhatag sang gubyernong Hapon. Maatag nga ang solo ng makabenepisyo sa kasugtanan nga ini amo ang mga kumpanyang Hapon nga daan na nga nagahimulos sa atrasado kag di industriyal nga ekonomya sang pungsod. Padayunon lamang sang mga kumpanya nga ini ang pagtukod sang ila mga pabrika sa mga *export-processing zone* sa pungsod kon

sa diin ginaangkon nila ang daku katama nga insentibo kag kunsasyon nga ginahatag sang reaksyunaryong gubyerno. Lakip diri ang pagpahanugot nga iangat ang tanan nila kinahanglanon nga sangkap sa produksyon halin sa ila pungsod, 100% nga pagpabalik sang ila tubo sa Japan kag pagpanghimulos sa mahuluy-on kag barato nga kusog sa pagtrabaho sang Pilipinas.

Ginapatampok sang kasugtanan nga ini ang kawad-on sang interes sang rehimeng Arroyo nga suportahan ang lokal nga industriya kag pauswagon ang ekonomya nga nagatindog sa kaugalingon kag industriyalisado. Interesado lamang ini sa temporaryo nga paghalog dala sang remitans sang mga *overseas contract worker* kag eksport sang pili nga mga produkto. Malaut pa, pat-ud nga pagawaskon sang mga kasugtanan pareho sang JPEA ang nabilin nga lokal nga industriya kag nagahimugto na nga mga sektor sang ekonomya sang Pilipinas. Kag bilang una sa serye sang mga di pareho kag mapangwasak nga bilateral nga kasugtanan nga handa sudlon sang reaksyunaryong gubyerno, nagapatimaan ini sang mas masingki pa nga krisis pang-ekonomya para sa pumuluyong Pilipino kag labi nga paglain sang malakolonyal kag malapyudal na sistema sa Pilipinas. AB



# Pagpaslaw sa RSOT sa Albay

*Gin-interbyu sang AB sining Agosto 27 si Ka Foyd, sekretaryo sang isa ka prenteng gerilya sa Albay, kon paano nila ginpaslaw ang RSOT nga ginalunsar sang AFP sa ila erya.*

**S**a sulod sang pila ka adlaw sadtong Pebrero 2006, ginsuyod sang 11 platun sang militar ang mga baryo sa tatlo ka banwa nga sakup sang prenteng gerilya nga ginapamunuan ni Ka Floyd. Ang pagsuyod nga ini sang kaaway amo ang una nga tikang sa siyam ka bulan nga pag-paidalum sa lugar sa operasyon sang Reengineered Special Operations Team (RSOT). Matapos ang pagsuyod sang 11 platun nga ini, nagsulod sa erya ang mga elemento halin sa 3rd Scout Rangers Battalion (SRB) kag 65th, 31st kag 42nd IB sang Philippine Army.

Katuyuan sang operasyong RSOT nga habigon ang balatyagon sang mga tagabaryo kag sa proseso kuhaan sang suportang masa kag waskon ang Bag-ong Hangaway sang Banwa (BHB) sa lugar. Naglunsar sila sang nagkalain-lain nga aktibidad sa mga barangay sa tatlo ka banwa para makuha ang katuyuan nga ini.

Bilang pang-umpisa nga tikang, ginpatawag sang militar ang mga upisyal sang barangay agud ipaabot nga magapabilin sila sa lugar kag ipaidalum nila sa ila kontrol ang erya sa sulod sang madamu nga bulan.

Sa sulod sang siyam ka bulan, gin-isa-isa sang RSOT ang mga barangay sa erya. Ginhimo ang pagsensus sa kada sityo. Ginhibalo sang kaaway ang numero sang mga bubong sa lugar

kag ginkilala ang mga pamilya kag ang kada indibidwal. Ginkabisar man sang kaaway ang tereyn.

Agud makuha ang balatyagon sang mga tagabaryo, naglunsar ang militar sang mga proyekto pang-imprastruktura kag iban pa nga serbisyo sosyal kuno pareho sang pagpakay-o sang mga *basketball court* kag paglimpyo sa higad sang mga dalan. Gintukod man sang kaaway ang ila lambat-paniktik sa tatlo ka banwa. Mga babaye nga kilala nga dalahig sa mga anti-sosyal nga aktibidad sa baryo ang ila gin-pili. Ginpangaluyagan sila sang pila ka soldado nga nakatoka sa mga ini kag sinilaw sila sang kwarta.

Tubtub kaaganhon sila nga nakig-inuman sa ila kag masami man sa balay mismo sang mga ini nagatulong ang mga

soldado.


Halin naman sa mga barangay *police*, gintukod sang militar ang Civilian Volunteer Organization (CVO).

Sa ulihi nga hugnat sang operasyon nila sa mga barangay, naghiwat ang kaaway sang pangkabilugan nga pulong sa mga tagabaryo kon sa diin pwersahan nga ginapatambong ang pumuluyo.

Handa kag bilog ang panimuot sang Pulang hangaway. Malig-on ang desisyon sang yunit sang hangaway nga magpabilin kag magpadayon sang mga hilikuton bisan may "pwersang hibog kang kawal" (madamol nga pwersa sang kaaway) sa erya. Bilang una nga tikang, gilayon nga nagpulong ang yunit sang BHB. Gintalakay sa miting kon paano ilugar ang tropa sang BHB sa atubang sang bag-o nga kahimtangan sang pagdagsa kag madugayan nga pagmentinar sang tropa sang kaaway sa erya.

Kon diin ang halog, didto sila pumwesto. Suno kay Ka Floyd, luwas sa pagtungod sang matagadlaw nga hilikuton sa pagorganisa, ginplanuhan nila kon paano makabunal sa kaaway sa sulod sang erya.

Agud makontrol ang hulag sang kaaway, naglunsar sang mga operasyon haras-isnayp ang BHB sa pila ka pili nga barangay. Tuyo sang mga ini nga papatihon ang kaaway nga ginaprotektahan sang BHB ang nasambit nga lugar agud didto ikonsentrar sang militar ang ila tropa. Siling pa ni Ka Floyd: "Husto ang taktika." Mismo mga tagapamaba sang militar sa lugar ang nagasiling nga naipit na kuno nila ang BHB gani nagalunsar ini sang mga operasyong harasment kon sa diin napaa-tras kuno ini. Wala mahibal-an sang nga bangud sa ginkonsentrar nila ang ila tropa sa mga pili nga lugar nga ginalunsaran sang atritibong aksyon sang BHB, naghalog





ang iban nga barangay kag bwelo nga nakatungod sang hilikuton ang Pulang hangaway sa mga ini. Siling ni Ka Floyd, "Napasakay ang kaaway sa aton disenyo... kita ang nagatakda kon sa diin naton sila pakadtuon."

Wala bisan san-o nga natumod sang kaaway ang base sang mga Pulang gerilya. Bisan kis-a wala sila sang nakita nga yunit sang hangaway sang banwa. Wala sila sang nahimo nga anuman nga inisyatiba sa inaway. Baliskad sa tuyo sang kaaway, ang BHB ang permi may kapot sang inisyatiba kag nakabunal sa mga tropa sang RSOT. Halog nga nakalunsar ang BHB sang 12 operasyong haras-isnayp batuk sa kaaway. Isa ang napatay kag duha ang napilasan sa mga tropa sang kaaway sang tirahon sang BHB ang mismo nga kwartel ssang brigada. Sa isa pa nga operasyon sang mga Pulang hangaway, tatlo ang napilasan sa bahin sang 3rd SRB.

Gin-asikaso man sang mga kaupod ang pagnyutralisa sa mga babaye nga napatud-an nga nakigbuligay sa militar. Gilayon nga ginasugilanon ang nasambit nga mga babaye. Ginpahalin anay sa lugar ang pila agud indi na maimpluwensyahan sang kaaway. Ginhimo nga prayoridad pagkatapos sang siyam ka bulan nga pagtener sang RSOT sa erya ang pagkumpleto sang pagnyutralisa sa tumod nga mga elemento sang paniktik sang kaaway. Tanan sila ginhatagan sang mga warning kag kahigayunan para mag-untat na lang kag magbag-o.

Bangud makontrol sang Pulang hangaway sang hulag sang kaaway sa lugar, padayon pa gihapon nga makatungod sang hilikuton-masa ang mga kaupod didto. Sa panahon sang RSOT, nakapa-organisa pa ang mga tagabaryo sa mga Pulang

gerilya. Nakalunsar sang mga pagtuon. Padayon nga nasulong ang rebolusyong agraryo kag nakapatuhaw sang pinansyal kag materyal nga suporta para sa rebolusyonaryong hublag halin sa mga nahanunga nga pwersa sa sakup sang RSOT.

Yabi sa kadalag-an sang mga kaupod sa erya sa pag-atubang sang RSOT kag pagtungod pa gihapon sa mga hilikuton ang maidid nga pagtuon sa hulag sang kaaway, hugot nga koordinasyon sa masa kag aktibo nga pagbulig nila, lakip ang wala untat nga pagpaabot sang impormasyon sa hulag sang kaaway.


Permi nga nasundan sang yunit sang BHB ang pamaagi kag padron sang paghulag sang kaaway, amo man ang kada lain nga hulag sang mga ini. Nahibal-an sang yunit sang Pulang hangaway nga estilo sang RSOT sa ila lugar ang clustering ukon pag-oeprasyon sa tumpok sang tatlo ka magtambi nga barangay. Indi magnubo sa 40 tropa ang ginapakat sang militar sa tatlo ka barangay nga sakup sang clustering. Ang main body may pwersa pangseguridad nga isa ka platoon natulunga sa tatlo ka iskwad. Nakadeploy ang main body pangu-nahon sa isa sa mga barangay. Nakapasulod ini sang mga iskwad sa duha pa ka barangay. Isa sa mga iskwad sini ang naghimo sang clearing operations. Natun-an sang Hangaway nga 500 metros lamang ang ginamentinar nga kalayuon

sang pwersa pangseguridad sa main body. Bangud diri, masaranggan gid kaayo sang BHB nga bumase sa kaingod lamang nga barangay sang mga baryo nga yara sa idalum sang clustering bangud siguro nila ang distansya kag hulag sang tropa pangseguridad sang kaaway. Makakadlaw kon pinsaron, suno kay Ka Floyd, nga kon kis-a masaranggan pa nila nga bumase sa sulod mismo sang barangay nga sakup sang clustering.

Aktibo kag malapad man ang lambat-paniktik sang mga Pulang gerilya sa kubay sang tagabaryo sa lugar. Napaabot gilayon sa mga kaupod kon ano nga barangay ang sunod nga pagasudlon sang kaaway gani permi nga nahibal-an sang mga Pulang gerilya kon sa diin sila paborable nga bumase. Nasundan man nila kon sanday sin-o ang tawo sa baryo ang ginasugilanon sang militar para mangin elemento paniktik.

Sa paghalin sang militar sa erya, mataas ang kapagsik sang mga kaupod bangud luwas sa wala nadepensibo ang BHB bisan kis-a, padayon sila nga nakatungod sang ila mga hilikuton, nagapabilin nga mapagsik ang paghulag kag suporta sang masa, kag wala sang organisasyong masa kag rebolusyonaryong pangpulitika nga istruktura nga nabungkag sa lugar.

Siling ni Ka Floyd, "Bisan ginakontrol sang kaaway ang aton lugar indi naton dapat pagbayaan ang aton lugar. Magsanto kita sa sitwasyon. Dapat alalayan man naton ang masa sa panahon nga ginaipit sila sang kaaway. Dapat makita sang masa nga kita nagapabilin nga sandigan nila. Daku ang epekto kon bayaan naton sila bangud sila ang nakataya. Kon basta na lang naton bayaan ang masa maga-umpisa liwat kita sa uno sa pagbalik naton."





## Lima ka tuig matapos ang 9/11

**G**ingamit ni George W. Bush ang terorista nga atake sang al Qaeda sa New York City sadtong Septyembre 11, 2001 ("9-11") bilang tapalan para lusubon kag sakupon ang Iraq kag Afghanistan kag pahugon ang iban pang pungsod nga nagainsister sa ila kahilwayan kag nagapamatuk nga magpaidalum sa hegemonya sang US. Para diri, ginguyod ni Bush ang pinakadamu nga alyado kag papet nga estado sa mga gerang agresyon sa ngalan sang

"anti-terorismo."

Sa proseso, sobra nga mas malaut nga sari sang terorismo ang ginbuhian sang US sangsa sa pagpamomba sang al Qaeda sadtong 2001. Mas daku nga kahalitan ang dala sang US sa mga ginapasilabtan kag ginaokupar nga pungsod. Ginpahigad sini ang madamu nga pangkalibutanon nga layi kag sibilisado nga kumbensyon para dalayon nga madula ang ligal nga sablag sa ginahimo sini nga mga pagpangtapna.

Lima ka tuig na nga ginatapalan sang rehimeng Bush ang "9-11." Pero baliskad sa ginalauman sini, nahigop ini subong sa mga gera nga wala sang pasikadtuan kundi ang daku pa nga pagkalutos. Nagasingki ang pagpamatuk kag pagpakamalaut sang pumuluyong Amerikano kag sang bilog nga kalibutan samtang dugang nga nahayag ang wala unod nga mga dahilan sang US para sa pagpanggera sini. AB

## Nagatinambak nga kaswalti, nagalapad nga pagpamatuk

**H**alin sang lusubon sang US ang Iraq sadtong 2003 tubtub Septyembre 11 subong nga tuig nagaabot na sa 2,904 pwersang pang-okupasyon ang nagkalamatay. Sa numero nga ini, 2, 671 ang Amerikano, 118 ang taga-United Kingdom (UK) kag 115 ang halin sa nagkalain-lain nga pungsod. Indi magnubo sa 19,945 suldado sang US ang napilasan sa mga inaway kag ginatantya nga masobra 30,000 na ang nagbuang bangud sa sobra nga sikolohikal nga halit tuga sang gera. Sa Afghanistan, halin sang atakehon ini sang US sadtong Oktubre 2001 tubtub Septyembre 2006 may 475 na ang namatay nga pwersa pang-okupasyon—335 sini Amerikano kag 140 ang nagkalain-lain nga nasyunalidad. Samtang, 894 naman ang napilasan nga mga tropa sang US.

Ginatantya nga masobra 200,000 sang mga sibilyan ang nagkalamatay kag napilasan samtang minilyun-milyon na ang nadulaan sang balay dahil sa wala pili nga pagpamomba sang US sa Iraq kag Afghanistan. Minilyun-milyon ang nagaantos sang masingki nga gutom bangud sa pagpanganyon, pagpamomba kag mga operasyong militar sang US. Kadam-an sa ila kababaihan kag mga bata. Lapnagon ang pagpanglugos, pagpanunog, pagpamuyong kag iban pa nga paglapas sang mga tropa sang US sa tawha-non nga kinamatarung.

Sa nagkalain-lain nga bahin sang kalibutan, nagalapad ang pag-

kundena sa pagpangera sang US. Sa UK, napilitan si Prime Minister Tony Blair nga ideklarar ang iya pagbiya pag-abot sang Hulyo 2007 bangud sa pagkadalahig nila sa gera sa Iraq kag Afghanistan. Sa Canada, nagapamatuk na ang pumuluyo sa pagpadala sang mga tropa kag sa Spain kag Italy, nalutos sa eleksyon ang mga kandidato nga nagasuporta sa nasambit nga mga gera. Sa US, mabaskog nga ginakundenar sang mga pamilya sang mga suldado ang pagpalawig pa sa tour of duty (natalana nga panahon sa serbisyo) sang mga ini. Ugaling sa baylo nga magbuhin sang tropa, nagaabot na subong sa 132,000 ang mga suldado



sang US sa Iraq kag ginatantya nga maabot ini sa 140,000 pag-abot sang 2007.

Daku nga mayorya sang pumuluyong Amerikano ang nagapamatuk sa pagpabilin sang US sa Iraq, pangunahon na bangud sa tuman kadaku nga kantidad ang ginapatuyangan sang rehimeng Bush kag sa nagadaku nga numero sang mga kaswalti nga Amerikano. Ginatantya nga maabot sa \$286 bilyon ang depisit sa nasyunal nga badyet sang US sa 2007 halin sa \$260 bilyon subong nga tuig bangud sa padayon nga pagbuhos sang rehimeng Bush sang kwarta kag iban pang resorsa sa pagpangera sini sa Iraq. AB



# Dugang nga kabutigan, nabuyagyag

**D**ugang nga kabutigan bahin sa paghupot kuno ni Saddam Hussein sang mga armas nga makamamatay ang nagguwa subong nga di matuod nga pahayag sang rehimeng Bush.

Suno sa mga dokumento nga ginapagguwa sa publiko sining nga Septyembre sang US Central Intelligence Agency (CIA) sadtong Oktubre 2005 nga "wala kaangtanan kag wala ginatago ni Hussein ang grupo ni Abu Musab al Zarqawi, isa sa pangunahong lider sang al Qaeda nga nagabase sa Iraq. Sa kamatuoran, suno sa nauna nga report sang CIA sadtong Enero 2003, ginakabig ni Saddam nga pamahog sa nasyunal nga seguridad ang mga "ekstremis-tang Islamiko" nga nagaopereyt sa sulod sang Iraq.

Ang presensya nanday Zarqawi sa Iraq ang isa sa mga ginangasal nga "evidensya" sang rehimeng Bush nga ginasuportahan kuno ni Saddam ang al Qaeda kag basehan para pukanon ang iya gubyerno. Namatay sadtong Hunyo si Zarqawi sang bombahan kag salakayon sang mga tropa sang US ang bilding nga ginakutaan niya sa Iraq.

Kaangot sini, napilitan man si Bush nga akuon ang pagluntad sang lambat sang mga sikreto nga bilangguan sa nagkalain-lain nga bahin sang kalibutan kon sa diin ginahunong sa wala pat-ud nga panahon kag ginatortur ang mga ginasuspetahan nga terorista. Ang kadam-an sang mga bilangguan nga ini, nga ginadumalahan sang CIA, yara sa Eastern Europe kag Western Europe kag pila ka pungsod sa Asia pareho sang Pakistan kag Thailand. Luwas ini sa hayag nga mga bilangguan sa Iraq kag Guantanamo, Cuba.

Agud pakalmahon ang kaakig sang pumuluyo sa nahayag nga wala hawid nga paglapas sa tawhanong kinamatarung, ginaanunsyo ni Bush ang pagtukod sang mga espe-

syal nga hukmanan militar para bistahon ang mga ginasuspetsahan nga "terorista." Pero ginman-du sang Korte Suprema sang US sadtong Hunyo

ang pagbungkag sa mga ini bangud labag ini di lamang sa mga probisyon sang Geneva Conventions nahanungod sa pagtrato sa mga bihag sa gera kundi sa mga layi mismo sang US. Wala ginakilala sang rehimeng Bush ang mga detenido bilang mga bihag sang gera nga may mga kinamatarung kundi mga "kaaway nga kombatan"—isa ka ginimbento nga kategorya sa mga detenido nga wala sang anuman nga kinamatarung.

Ginapamatukan man sang Korte Suprema kag iban pang kritiko ang ginaproponer ni Bush nahanungod sa otorisado nga paggamit sang "pwersahan nga mga pamaagi" ukon tortur para paakuon ang mga suspetsado kag paggamit sa korte

sang mga ebidensya nga nakuha sa amo nga pamaagi. Batuk man sila sa ginaproponer nga mahimo bistahon kag husgahan ang mga akusado base sa sikretong ebidensya kag paglibre sa mga demanda sa mga operatiba sang CIA kag iban pa nga "interrogator" nga nagamit sang "pwersahan nga mga paagi."

Para makalampuwas sa mga limitasyon nga ginatalana sang desisyon sang Korte Suprema sang US sa mapang-abuso nga pagtrato sa mga detenido, ginahingyo subong ni Bush sa Kongreso sang US nga magpasar sang mga layi na magaligalisa sa kategorya nga "kaaway nga kombatan" kag sa tanan nga iban pang katuwang sini nga polisiya nga nagalapak sa tawhanong kinamatarung. Sa partikular, gusto ni Bush nga iduso liwat ang pagtukod sang mga hukmanan militar kag paghusga base sa "sikretong ebidensya."

Pero malayo nga matupa ang kagustuhan nga ini ni Bush sa atubang ang mabaskog nga pagpamatuk pati sang mga kapartido niya sa US Senate kag sang pila ka suod niya nga alyado. **AB**

## Doktrinang Bush, ginatudok sa AFP

Nagahana ang labing pagsingki sang mga pagkuot kag pagpamatay sa mga aktibista kag pagtapna sa mga protesta matapos ianunsyo sang rehimeng Arroyo ang plano sang US nga dugangan ang ayuda-militar sini sa Pilipinas kag hatagan sang paghanas-militar ang tanan nga yunit sang Armed Forces of the Philippines (AFP). Ginanunsyo ini ni Arroyo matapos ang iya pagbisita sa hedkwarters sang US Pacific Command sa Honolulu, Hawaii sining Septyembre 17.

Pat-ud nga pagagamiton nga balayon sang paghanas ang doktrinang Bush nga nagapahigad sa tanan nga establisadong prinsipyo sang makatawo nga layi kag pagsulundan sa gera. Labi nga nagaserbi ang AFP bilang pangunahong instrumento para pangapinan ang tuta kag garuk nga rehimeng Arroyo kag tapnaon ang mga patriyotiko kag demokratikong pwersa. **AB**

## 7 suldado patay, 5 napilasan sa ambus sang BHB sa Samar

PITO ka suldado sang 14th IB ang namatay kag lima ang napilasan sang ambuson sila sang mga Pulang hangaway sa idalom sang Arnolfo Ortiz Command (AOC) sang Bag-ong Hangaway sang Banwa (BHB) sadtong hapon sang Setyembre 15 sa Sityo Cantipon, Barangay Casandig, Paranas, Samar. Ang mga suldado, nga lulan sa isa ka trak, nakabalik lamang halin sa

sentro sang Paranas sang lambatan sila sang BHB. Gintabunan sang militar ang ila mga kaswalti sang ginreport nila sa midya nga isa ka suldado lang ang namatay kag duha lang ang napilasan sa ambus.

Sa isa ka pahayag, ginsiling ni Ka Vicente Magbuhat, tagapamaba sang AOC, nga ang ambus isa sa mga porma sang pagpatuman sang

rebolusyonaryo nga hustisya para sa mga biktima sang nagakalatabo nga mga pangpulitika nga pagpamatay kag iban pa nga paglapas sa tawhanong kinamatarung sa Eastern Visayas. Ginapakita man sini, siling niya, ang pagbaskog sang armadong paghimakas sa Samar baliskad sa ginapanugid sang militar nga nagahina na ang rebolusyonaryong hublag diri.

## Magabato ako tubtub sa katapusan—Nicole

“MAGABATO ako tubtub sa katapusan”—ini ang reaksyon ni “Nicole,” 22-anyos nga dalaga nga ginlugos sang apat nga US Marines sadtong Nobyembre 2005 sa padihut sang mga tinawo sang Department of Justice (DOJ) nga kumbinsihon siya nga makipag-areglo kag sa ila mga pagpanamad bahin sa iya.

Ginbuyagyag niya kag sang iya iloy sa midya sadtong Setyembre 16 nga gintuyo ni Senior State Prosecutor Emile Fe de los Santos nga kumbinsihon siya nga makig-areglo na lang sa mga akusado. Suno kay De los Santos, kon indi sila magpaareglo igapasaka sang gubyrno sang Pilipinas sa US ang pag-abswelto sa mga akusado kabaylo sang paghatag sang US sang asylum kay anay agriculture undersecretary Jocelyn “Joc-joc” Bolante. Gusto man ni De los Santos nga hambalon ni Nicole sa korte nga indi na niya pagpadayunon ang kaso bangud kapoy na siya kag wala sang mahimo pa ang iya abugado. Ginbuyagyag ini sang mag-iloy bangud nahibal-an nila nga “gina-hampangan” lamang sang mga abu-

gado sang gubyrno ang kaso. Sa baylo nga tum-ukon ang akusado, pumabor pa sa iya ang mga pamangkot sang prosekusyon.


Bunga sini, nag-walkout sa korte ang mag-ina kag nagsulat kay Secretary of Justice Raul Gonzalez agud iinsister nga bayluhan ang puno sang mga prosekusyon bangud wala ikasarang ang mga ini kag indi mapatihan. Pero nagbalibad si Gonzalez kag sa baylo gindempensahan pa ang iya mga tinawo. Ginsamaran niya si Nicole sa pagsiling “basi sa imahinasyon na naman niya ang tanyag nga pagpakig-areglo.” Madugay na ginapakita ni Gonzalez ang wala niya pagsimpatiya sa biktima. Antes pa man ang pagbista sa korte, ginaduso na niya ang pagpamagan sa kaso sang tatlo sa apat ka akusado kag ginpalapnag niya sa publiko ang sala nga impormasyon nga magaatras na sa kaso si Nicole.

Nagpalahid-lahid man si Gonzalez nga ginasulsulan lang sang pribado nga prosekusyon nga si Evalyn Ursua ang mag-iloy nga mag-walk out kag magtuga sang gamu bangud ginakwartahan sang organisasyon si Ursua, ang


TOWNS Foundation, ang pagpadayon sang kaso. Ang TOWN Foundation, isa ka organisasyon sang kababaihan, ang pangunahon nga nagalunsar sang mga aktibidad para makatipon sang pondo panggasto para sa pagpasulong sang kaso. Gilayon nga ginapangin-wala sang TOWNS Foundation ang mga palahid-lahid ni Gonzalez. Siling sang mga myembro sang TOWNS, handa sila nga ibukas sa publiko ang rekord sang mga donasyon sa ila. Nagpromisa man sila nga padayunon ang kaso ni Nicole.

Sa katapusan, gin-ako man ni De los Santos nga nagtanyag siya sang areglo sa pihak sang nauna nga pagbalibad sini. Akig katama nga ginaakusahan ang mag-iloy nga “samad-ulo” kag “wala sang utang nga buot” nga daw personal nga pabor sa biktima ang pagtungod niya sang iya katungdanan bilang prosekusyon.

Bilang sabat, ginapahayag ni Nicole nga indi siya magtambong sa pagbista kon indi pagbayluhan ang mayorya sang mga prosekusyon. Nahibal-an ni Nicole kag sang iya mga tagasuporta nga kahimbon sang mga akusado kag sang US ang rehimeng Arroyo sa pagluto sang kaso.





**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXVIII Blg. 18  
Setyembre 21, 2006  
www.philippinerevolution.org

## Editoryal

# Pat-ud ang pagpukan sang rehimeng Arroyo

**D**alayon nga nagasingkal kag nagadalum ang krisis sang pagginahum sang rehimeng US-Arroyo. Una ini nga nagwasaag sang lumupok sadtong Hunyo 2005 ang mga hublag protesta matapos nabuyagyag ang pagdinaya sa eleksyon 2004 sa "Hello Garci" teyp kag pagkadalagang sang pamilyang Arroyo sa jueteng kag nagkalain-lain pa nga anomalya. Naglab-ot sa isa ka bag-o nga halintang ang krisis nga ini sa pagginahum sang ideklarar ni Arroyo ang State of National Emergency sining Pebrero nga sinundan pa sang deklarasyon sang "all-out war" nga nagbunga sang mapintas nga pag-atake sa mga ginadudahan base sang rebolusyon sa kaumahan kag sa demokratikong kahublagang masa kag mga kaaway ni Arroyo sa pulitika.

Gamit ang nagkalain-lain nga tuso kag mapintas nga mga padihot kag maniobra, nakapadugay si Arroyo sa poder. Pero kadungan sini ang labi nga pagsingkal sang krisis kag pagbaskog sang panawagan nga batuan kag pukanon ang iya garuk, mapaniplang, papet kag brutal nga rehimen. Labi sini nga ginahamulag ang kaugalingon, ginapabukal ang kaakig sang pumuluyo kag ginapalig-on ang determinasyon nila nga magbato.


Gin-abuso ni Arroyo ang iya gahum kag naggamit siya sang mga pamaagi nga diktador sa iya halos madasma nga pagpugong sa kamatuoran, tabunan ang iya mga krimen, depensahan ang kaugalingon kag kugmaton ang iya mga pangontra. Ginatiyug-tiyogan

kag ginatiko niya ang nagaluntad nga reaksyunaryong konstitusyon, mga layi kag proseso kag wala panugantugan nga ginalapakan pati mga desisyon sang Korte Suprema. Paagi sa malaparan nga pagpanuhol, kapot niya nga mayorya sa Kongreso kag paglapak sa mga proseso, nahimo nga lagi-lagi ginpabasura ni Arroyo sa mga suluguon niya nga kongresista ang ikaduha nga

kaso sang *impeachment* sining Hulyo. Padayon man ini nga nagapakatig-a nga dumilian ang mga upisyal sang AFP kag gubyrerno nga magtambong sa mga imbestigasyon sang Senado kag Kongreso.

Kadungan sini, wala sing may nagakanngilin nga ginagamit ni Arroyo ang iya gahum kag pribiliheyo agud suhulan ang mga kongresista, lokal nga upisyal, mga upisyal sang militar, huwes kag pati mga tawong simbahan. Ang indi mabakal ginapaagi sa kugmat kag pagpasaka sang kaso nga "rebelyon" kaangot sang mga aksyong protesta kag tuyo kuno nga kudeta sadtong Pebrero lakip ang 40 nga una ginkasuhan. Samtang, ginpasakan sang libelo kag ginaduso ang pagpahalin sa Kongreso kag lisensya bilang abugado ni Rep. Allan Peter Cayetano bilang balos sa pagbuyagyag niya sang nakatago nga manggad sang mag-asawang Gloria kag Mike Arroyo sa luwas sang pungsod.

Ginakugmat pati ang



**Mga tampok  
sa isyu nga ini...**

**Waay na nahuya  
si Arroyo** PAHINA 4

**Pagpaslaw sa RSOT  
sa Albay** PAHINA 8

**Lima ka tuig matapos  
ang 9-11** PAHINA 10

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*